

Lessons for Advent, Uluk Lang. of N.G.

ADVENT AN GIU.

For the New Guinea Mission.

*Printed at the Melanesian Mission Press,
138 Smith Street, Summer Hill, N.S.W.*

E3
1652
A

ADVENT AN GIU.

1. (a) Iesu Keriso an Nat Ainau.
(b) Iesu Keriso an Nat Bairuin.
2. Advent an Botitiwag.
3. Mamaba God ta nos.
4. Mamaba God an Sabu si botitiwag.
(a) Aiwab dam — Mary Matafin. Baiyoboin.
(b) Aubairuruotis asi Warar — Zacharias.
(c) Iesu an Baiyoyobotis.
5. Ot mamaba ta n botitiwag Nat Bairuin mes.
6. Mamaba nunuat ta n botitiwag Iesu Ayubin i na r.

ADVENT - COMING - I N NAT.

1. Iafan i n nat? Ati Bada Iesu Keriso, ati Baiyawasotin.

(a) Iesu Keriso nauene au tafanam i nat safam emon. On rai i nat fifi ba i rat, ayon i kaifarai i geg orot ba, sabu basusi i mian, an bobo i four, i yababan sabu komasis imasi, i rabob, ra baitonin i misir men, i gae men au safam Taman aurin, nan e mama wantoan.

(b) Ra tani i n nat, men fifi ba baise aiwab gagamin, an kudidirai, angels mat, sabu engon i n itetemis asi sif nanaba i n igaramines. God an Ekalesiai Advent an rai i itet an nat bairuin aurin taot ta n botitiwag mes.

2. ADVENT AN BOTITIWAG MAMABA ?

(a) Christmas an ra aurin ta n botitiwag.

(b) Iesu Keriso an nat bairuin aurin ta n botitiwag.

(c) Nunuat ta n botitiwag ati Bada amonai i na r mes.

3. MAMABA GOD TA NOS ?

Anai God Safam tafanam ba abiabi engon rerebai fofotanai ba i fouris. Mafam obin maiiau i four nan orot i fourai, orot amonai an aratain i babain, ato orot on ayubin yawasin. On rai God an mafam obin maiiau basunai Adam rus si bibib mat si ikakafun, turan turan ba. Ra i nat, Satan au mafam i rui, Adam awan rus i rutobones fonan si tatam, God an dur si sisiwei, bobo komasin si four. On aurin Adam i bomomai, i ob, men God nanai taon i yoboai. Baise men basit sabu God an mafam obin maiiau si t ikomasai, ab obin wantoanin God i gogoi, on durin Adam awan rus i bo gatevis si gat ; God an mafam obin i kaifarai an sabu si bosisirai osi auris.

God nanatun usis er ayubis. Ayubiti God an gogoi ta n nos God ta n iurai namon fonan ta n tatam. Ta babayoi on rai God basit i n ibebeyet ta n sagob abifan ta ta four. Sabu fani se mama God fonan ra tutufin se tatam an gogoi se four— Abraham, Moses, orot fani ba. Osi God an bobo, si robotet aubairuruotis si yores. Sabu God fonan se tatam, osi se gogoi God min Tamas, se gogoi an mafam obinai si ta r men, on Safam ta yorai. Baise ati netawarotin ambin, eta ta sagob wat. On aurin God an sabu netawarotin se nunuen God an efan aurin i t netawaris, nan nunuas si t sisir wantoan, ati bobo obis ba. Aubairuruotis si sagob God netawarotin i t iafarai, sabu si botitiwag babag gibubunuin mes weie, on aurin sabu si ibebeyes abiai si t botitiwag. Sabu fani fonaserotis aubairuruotis asi dur men si tatam, on aurin on rai netawarotin i nat, men si botiwag babag.

4. MAMABA GOD AN SABU FANI SI BOTTIWAG ?

(a) **Aiwab dam.** Nauene God Israel yangan, Jews si yores, i rubinis osi an Ekalesia sabu fani tafanamai si mama osi auris God si t yoboai. God an Dur Kakafotin Jews yangan auris i kasonet abiabi engon aubairuruotis asi sabu, si ibebeyes. Fani asi dur men si tatam, osi bobo komasis si fouren, ato yababan gagamin sabu sigaraba auris i matar. On aurin namon asi ragit si nat si bio Jews men faiwaris, asi ragit si sowares si fatumes. Arimon asi ragit si iafares men, asi au mafam si t matabir, asi aiwab si sofafares men si ti iaiwab. On aurin aiwab dam asir si mama sabu engon basusi, mat si bobo sabu engon nanaba. Baise God an sabu katutumis nosis men si fot, asi aiwab dam basusi si mimian si nosin, eb ra i t nat God asi ragit i t faitanis nan, taos asi aiwab ra tani i t ifaiwarai.

Aiwab dam auris jever kaita i mama wabin Mary, orot kaita Joseph osi rus mafam kafakaii Nazareth ene si mimian. Ra fufur Mary an bobo nuatainai i four, baibebeyotis asi dur engon i tatam tiwag, namon God aurin si ikakafun. On matafin, nunuan nosin obis, eb ra fufur God nanai i babayoi, on aurin on rai God nunuanai i auur, on i sagob bag, baise sabu fani fonan men si tatam on.

ANNUNCIATION — BAIYOBOIN. Ra kaita Mary ekesin goai e mama nan, Anela Gabriel God baiwasagotin aurin i rui, i au : Oro Mary ! God om mat e mama on yan i sisir bag om aurim. Mary i ber, ato dur anela i au on men i sagob on mes. Gabriel

i au : Abi e ber, Mary. God taon om amomui, eb natun bag i n item. On yamai i na rat fifi kafakakai ba, i n ituai weie si n yorai Kakafotin, God Natun. Un yorai Iesu, on Baiyawasotin God i aumatan on. Mary i au : God an agir jever e iteu. Basit auriu an dur nana.

Ra kafakakaimom weie, Joseph taon an goai i enbubur, anela i nat God an gogoi i yoboai, Joseph Mary i t kaifarai tiwag, God Natun bag i itai on mes, Mary aurin usin i t boai. Ra ta ra tani Iesu wabin ta yorai Emmanuel, on "God basuti."

On aurin Joseph i four God i au nana, ato Mary i ibaisin on natun an rat ra aurin i botitiwag, on Baiyawasotin, Iesu Keriso.

(b) **Aubairuruotis asi Warar.** Anela Gabriel Mary i nefotai God Natun na rat i yoboai weie Mary i misir an robruruman, Elisabeth, aurin i nae. Namon goai i rur, Elisabeth Ayu Kakafotin an faiwar i sagob, on Mary i auriu : Om jever baimomogim, God om i rubinem jever engon basusi i n imomoginem bag. Yau mat i imomogineu, au Bada ayon auriu i nat on mes, eb natu amouui on mat i sisir bag. Gibui Mary baifain an kwarer i rab God nanai on i imomoginai babag. An kwarer ta yorai Magnificat, on Baigagamin.

Roke ruamom ato bobo gibunai, bobo obin fafa Zacharias aurin i matar, on Elisabeth awan. On Priest ene, sabu netawarotin si biamar, aurin si botitiwag, osi auris on kaita. Bobo kaitamon taon aurin i gogoi, natun min. Ra sigaraba i bayoi God i ifefeyan natun i t itai, baise ato rai on awan rus orokwar jenukwar si matar natus ambin. Ra

kaita an rai an temple i ta r Altar nanai i t tawar fifu'ai, namon sabu si babayoi. Garuwat fifu an kasakasauai asumaiauai i tatawar Bada an angel i itai. I ber, baise angel i auur i au, Abi e ber, Zacharias God am bayoi i tatam on mes, awam Elisabeth natum orot i n toub. On min John u n baton. Nunuam i n sisir bag, sabu fani sigaraba nunuas si n sisir an rat rai, on Aubairuruotin gagamin, Ayu Kakafotin i n bonuai, bobo gagamin God aurin i na four. On i n nat God an sabu i n botitiwag netarawotin God i iafarai on an nat mes. Bobo komasisotis nunuas si n kitabir, bobo fetagotis si n fourtobon asi bobo si n iobinen God an gogoi si na four men, John fonan si n tatam weie.

On aurin Elisabeth Zacharias rus si momosin namon fifi i rat, si iwabai John, angel i au nana. On fifi on rai si ibebeyai God an dur aurin, si kasonai namon aiwab ainau i t iafarai eb on min Aietunene an Aubairuruotin, Bada nanai i t inao an eta botitiwagis mes ; men tafanam an eta, baise orot nunuas auris. On aurin, arimon John orot bag i misir i gat God an bobo aurin i botiwag babag. Ra sigaraba ekesin gewosai i mama, i babayoi, God fonan i tatam God an gogoi i t sagob tiwag mes.

Namon Iesu, on orot bag, taon an bobo i bosuruf, on ainau John i gat Jordan rewanai i binou, nan sabu sigaraba asi bokomas si yatet si bapataito, eb John Iesu aurin i aududur, i kasones Keriso i iufin arimon si t itai on.

Keriso i nat God an abu mafam obin an eta i t yoboos. I nat, on rai John i baton i au, Wo it, on ene aurin a kasonem on i nesereu, God Natun bag,

tafanam an baiyawasotin, Aiwab ainau aurim God i iafarai on.

(c) **Iesu an Baiyoyobotis** si botitiwag. Sabu John si tatam on, fani auris netawarotin si momosin, God i aumatan on. Osi si gogoi God an mafam obin an eta si t gaturai. On aurin Iesu i nat weie John i au : Ato ene on min o momosin an eta yau a botiwag on. On min God Natun bag, tafanam an Baiyawasotin : on ra ene atosi orot si matabir, Iesu si gibubunai. Au me on i nae osi mat si nae, an bobo moanobinai i fouren on engon si iten, an dur engon sabu i ibebeyes on si tatam, God an baiaiwab safamai mes i ikakafun. Ra ta ra tani i auures on mes si sagob tiwag, baise bayoi God nanai i ibebeyes, eb God an Ayu Kakafotin nunuasi i yein, on i t ibaisis si t sagob bag.

Gibui, Iesu au safam God aurin i nae men weie, an baiyoyobotis engon i kasones on si nosin, si gayam, sabu engon si t iab on mes, engon eta Iesu i netawaris nan si t sagob. Ot Aumatan Bouboun (Parivainota Vouna — New Testament) ta iaiab on, Iesu an baiyoyobotis Iesu aurin si baton on ta iaiab.

5. OT MAMABA TA N BOTITIWAG

KERISO AN NAT BAIRUIN AURIN ?

Abifan ainau si gayam on ot baibebeyet mes si gayam : ot gayam an rutanobai kubainunubai ba baiamar a t boai on mes. Wasagobin God an Baiaiwab aurin i kasonet, eb abiai nan ta na r.

Iesu i au, Yau eta ; men iafan God aurin i n nat eb yaui. Ot ta bapataito, Keriso mat ta

kuayo, On Usin yayawasin tuturis, on Ekalesia, Katutumis engon asi kuayo baimomogin. On aurin an dur ta n tatam ta n boai, ot Keriso aurin ta mimiam. Nanaba ta n gibubunai etai au safam i netawar.

Iesu i au : Yau Dur maiiau. On God Natun bag, on aurin God an Dur i sagob tiwag, sabu auris i t baton tiwag. On aurin ta sagob God aurin an Baiaiwab aurin ba Iesu i baton on, on dur maiiau.

Iesu i au : Yau Yawas ene. Iesu, God Natun bag, an efan safamai i ikirir, nin tafanamai sabu basai i t miam. An yawasai i yoboet mamaba ot ta t yawas, mamaba God an gogoi ta ta four. On i ibebeyet mamaba God usit i kakaifares ayubit mat. Kebor obis engon tafanamai, God emon se nat, eb osi God si itutumai asi yababan ambin, abiabi obin ta t boai God engon i n itet namon ta babayoi. Iesu i au : Men abifan aurin o n yababan ab engonai, bayoiai ifefeyanai ami gogoi God aurin o n yoboai. Eb bobo tani, men ta na ber usit asi baban auris. Arimon usit si na rab, baise ayubit si na ma wantoan. Ot nin tafanamai ta n rubin ayubit God nanai si n yawas si n sisir an baiaiwab safamai, ab rabob gibunai Gehenai si n yababan wantoan.

Iesu i au : Osi usit si n asubunis abi o na ber, ab on i faiwar ayubim usim ba Gehenai i t goros. On afaguban, Satan, ra fufur i rutobonet, bobo komasis ta ta four. Baise osi Iesu si itutumai an Dur si boai, osi si faiwar bobo obis si ta four mes. Ekalesia Sacrament i itet — Bapataito, namon Keriso tuturis ta matar ; Ayu Kakafotin an yawa-

taf an baibai i itet nan ; Sacrament Kakafotin Momogin maiiau, onai Iesu an yawas bag i itet, Usin an Tar Kakafotis.

Ekalesia ato rai Advent i itet, on yawas tani ato yawas gibunai ta n nosin mes, ayubit asi yawas. I ibebeyet ati Bada an nat ra gibubunai aurin ta n botitiwag ; on rai i n bitetemit, i n igaraminet ati babo nanaba.

John Bapataito Jews yangan auris i auku, nunuas si t kitabir, si t botitiwag Bada i nat mes, nanaba min Ekalesia i kasonet, Gayam Kakafotin, an durai nunuat ta n kitabir, ta n botitiwag ati Bada an baitetem aurin.

6. MAMABA TA T BOTITIWAG NUNUAT AURIS IESU KERISO I NA R ?

Iesu amoti men abifan ta na ber, Satan i yababanit wat eb bobo komasis ta na four wat. Baise basit nunuat ta n botitiwag, men basit efan komasinai ati Bada i ta r. Bobo fofotanai, woman an bobo ta n ikirir, bobo obis ta n nuen, nunuat ta n reben Keriso an ratafin aurin, efan obin gumidarin ati Bada aurin ta n botitiwag. Ato nanaba Christmas an ra i n nat, nunuat si n sisir ta n au : "Nunuau aurin e nat, Bada Iesu, nin efan om aurim i en."



